

東坡集

三十四五

卷三十六卷三十七欵



漢書門			
一〇二二	七四二	一八二	類
二二	四二	八二	架
一	二	三	冊

內閣文庫			
漢書			
一〇二二	特四十一	一八二	類
二二	三三	二二	架
一	二	三	冊

內閣文庫			
番號	漢	10222	
冊數	12(11)		
函號	圖	2	3



東坡集卷第三十四

青詞二首

鳳翔醮土火星青詞一首

淺草文庫

嗚呼天之保佑下民罔不至所資以生罔

不我咎乃不恭畏于神祇不脩勅厥心驕淫矜夸以



干上帝威命帝用不赦丕降罪疾于下則惟雨暘常

以訖我黍稷禾菽麻麥我民用蕩析隕越天亦終哀

矜其忍翦棄其命罔子遺今秦民既不獲于秋乃十

旬弗雨曰其尚克有夏走于山川鬼神亦罔不至既

旬弗雨曰其尚克有夏走于山川鬼神亦罔不至既



72

東坡集卷第三十四

東坡集

不獲乃曰維熒惑鎮星次于井秦民其亦應受多罪
茲用即于齋宮爲壇位以與百姓請命嗚呼其庶幾
哀之俾克有夏亦克藝厥秋民今其粟粟朝不能夕

徐州祈雨青詞一首

河失故道遺惠及於東方徐居下流受害甲於他郡
田廬漂蕩父子流離飢寒頓仆於溝坑盜賊充盈於
犴獄人窮計迫理極詞危望二麥之一登救飢民於
垂死而天未悔禍歲仍大荒水未落而旱已成冬無
雪而春不雨煙塵蓬勃草木焦然今者麥已過期獲
不償種禾未入土憂及明年臣等恭循舊章並走群

望意水旱之有數非鬼神之得專是用稽首告哀籲
天請命若其賦政多僻以謫見于陰陽事神不恭以
獲戾于上下臣實有罪罰其敢詞小民無知大命近
止願下雷霆之詔分勅山川之神朝儕寸雲莫洽千
里使歲得中熟則民猶小康

祝文三十四首

禱雨蟠溪文一首

歲秋矣物之幾成者待雨而已穠者已秀待雨而實
三日不雨則穠者不實矣莢者已孕待雨而秀五日
不雨則莢者不秀矣野有餘土室有閑民待雨而耕

且種七日不雨則餘土不耕閑民不種矣穡者不實
莢者不秀餘土不耕而閑民不種則守土之臣將有
不任職之誅而山川鬼神將乏其祀茲用不敢寧居
齋戒擇日並走群望而精誠不歆神不顧荅吏民無
所請命聞之曰號有周文武之師太公其可以病告
乃用大禋之禮禱而不祠穀梁子曰古之神人有應
上公者通乎陰陽君親帥諸大夫道之而以請焉夫
生而為上公沒而為神人非公其誰當之詩曰維師
尚父時維鷹揚亮彼武王肆伐大商會朝清明公之
仁且勇計其神靈無所不能為也吏民既以雨望公

公亦當任其責敢布腹心公實圖之尚饗

鳳翔太白山祈雨文一首

維西方挺特英偉之氣結而為此山惟山之陰威潤
澤之氣又聚而為湫潭鉅罍罐勺可以雨天下而況
於一方乎乃者自冬徂春雨雪不至西民之所恃以
為生者麥禾而已今旬不雨即為凶歲民食不繼盜
賊且起豈惟守土之臣所任以為憂亦非神之所當
安坐而熟視也 聖天子在上凡所以懷柔之禮莫
不備至下至於愚夫小民奔走畏事者亦豈有他哉
凡皆以為今日也神其盍亦鑒之上以無負一聖天

子之意下以無失愚夫小民之望尚饗

奏乞封太白山神狀一首

附
為太守宋選作

伏見當府郿縣太白山雄鎮一方載在祀典案唐天寶八年詔封山神為神應公迨至皇朝始改封侯而加以濟民之號自去歲九月不雨徂冬及春農民拱手以待饑饉粒食將絕盜賊且興臣採之道塗得於父老咸謂此山舊有湫水試加禱請必獲響應尋令擇日齋戒差官蒞取臣與百姓數千人待於郊外風色慘變從東南來隆隆獵獵若有驅導既至之日陰威凜然油雲蔚興始如車蓋既日不散遂彌四方

化為大雨罔不周飭破驕陽於鼎盛起二麥於垂枯鬼神雖幽報荅甚著臣竊以為功效至大封爵未充使其昔公而今侯是為自我而左降揆以人意殊為不安且此山崇高足亞五岳若賜公爵尚虛王稱校其有功實未為過伏乞朝廷更下所司詳酌可否特賜指揮

告封太白山明應公文一首

天作山川以鎮四方俾食于民以雨以暘惟公聰明能率其職民以旱告應不踰夕帝謂守臣予嘉乃功惟新爵號往耀其躬在唐天寶亦賜今爵時惟術士

探符訪藥謂為公榮寔為公羞中原顛覆神不顧救
今皇神聖惟民是憂民既飽溢皇無禱求衮衣煌
煌赤舄繡裳捨舊即新以佑我民尚饗

杭州祭諸神文十首

祈雨龍祠

神食于民吏食于君各思乃事食則無愧吏事農
桑神事雨暘匪農不力雨則時嗇招呼風霆來會我
庭一勺之水膚寸千里尚享

祈雨吳山

杭之為邦山澤相半十日之雨則病水一月不雨則

病旱故水旱之請黷神為甚今者止雨之禱未能踰
月又以旱告矣吏以不德為愧神以不倦為德願終
其賜俾克有秋尚饗

祈晴風伯

維神開闔陰陽鼓舞萬類行巽之權直箕之次陰淫
為霖神能散之下土墊澇神能曠之發軔西北弭節
東南風反雨霽神亦不慙尚享

祈晴雨師

天以風雨寒暑付於神亦如人君之設官置吏以治
刑政也人君未嘗不欲民之安天亦何嘗不欲歲之

豐乎刑政之失中民惟吏之怨雨暘之不時民亦不能無望於神也今淫雨彌月農工告窮歲之豐凶決於朝夕而並走群望莫肯顧答維天之所以畀於神神之所以食於民者庶其在此尚率厥職俾克有秋尚饗

祈晴吳山

歲既大熟惟神之賜害於垂成匪神之意築場爲塗卧穉生耳農泣于野其忍安視生爲楚英沒爲吳豪烈氣不泯視此海濤反雨爲暘何足告勞有絜斯醴匪神孰號尚饗

奉詔禱雨諸廟

噫嗟艱歲胡閔斯雨念我東南舖饒中土迎秋餞伏農不再舉有事郊廟萬方畢助漕溝絕流庭實未旅下書哀痛超軼堯禹矧茲守臣廢食悼懼民之禍福間不容縷今不愍救後訴無所天高莫謁神或可籲尚饗

禱雨社稷四首

噫我侯社我民所恃祭于北墉蒼陰之義陽亢不反自春徂秋迄冬不雨嗣歲之憂吏民嗷嗷謹以病告錫之雨雪民敢無報尚饗社神

神食于社蓋數千年更歷聖王訖莫能遷源深流遠
愛民宜厚雨不時應亦神之疚社稷惟神我神惟人
去我不遠宜軫我民尚饗后土

農民所病春夏之際舊穀告窮新穀未穉其間有麥
如暘得涼如行千里弛檐得漿今神何心茲此雨雪
敢求其他尚憫此麥尚饗稷神

維神之生稼穡是力瘞身為民尚莫顧惜矧今在天
與天同功招呼風雲孰敢不從豈惟農田井竭無水
我求於神亦云亟矣尚饗后稷

密州祭常山文五首

洪惟上帝以斯民屬於山川群望亦如 天子以斯
民屬於守土之臣惟吏與神其職惟通殄民廢職其
咎惟均哀我邦人遭此凶旱流殍之餘其命如髮而
飛蝗流毒遺種布野使其變躍飛騰則桑柘麥禾舉
罹其災民其固有子遺吏將獲罪神且乏祀茲用慄
慄危懼謹以四月初吉齋居蔬食至于閏月辛丑若
時雨沾洽蝗不能生當與吏民躬執牲幣以荅神休
嗚呼我州之望不在神乎父老謂神求無不獲克有
常德以名茲山其可不荅以愧此名若曰歲之豐凶
在天非神之所得專吏將亦曰民之休戚在朝廷我

何知焉則誰任其責矣上帝與吾君愛民之心一也
凡吏之可以請于朝者既不敢不盡則神之可以
謁于帝者宜無所不為尚饗

峩峩茲山望我東國為帝司雨涵濡百物自我再禱
應不旋轂迨茲有秋歲得中孰嗟此薄禮曷稱其德
陶匠並作新其楹桷豈以為報民苟不作歲去徂矣
麩麥未殖嗣歲之憂既謝且謁惠然雨我以永休烈
尚饗

比年以來蝗旱相屬中民以上舉無歲蓄量日計口
斂不待熟秋田未終引領新穀如行遠道百里一宿

苟無舍館行旅夜哭自秋不雨霜露殺菽黃糜黑黍
不滿困麓麥田未耕狼顧相目道之云遠飢腸誰續
五日不雨民在坑谷猗嗟我侯靈應響速帝用嘉之
惟新命服祈而不獲厥愆在僕洗心祗載敢詞屢瀆
庶哀斯民朝夕濡足尚饗

天子有命閔茲旱暵俾我守臣並走群望惟神聰明
慈惠求無不獲既再禱矣雖嘗一雨不及膚寸吏寔
不德不足以蒙神之休導迎善氣以致甘澤洪惟
聖天子之意其可不荅而飢羸之民將轉于溝壑其
可不一救之瀆神之罰吏其敢詞尚饗

維熙寧九年歲次丙辰七月某日詔封常山神爲潤
民侯十月某日具位蘇軾謹以清酌少牢之奠昭告
于侯之廟曰嗚呼旱蝗之爲虐也三年於茲矣東南至
于江海西北被于河漢饑饉疾疫靡有遺矣我瞻四
方大川喬嶽食于斯民者甚衆而受寵於 吾君者
可謂巍巍矣訐之而必聞求之而必獲惠我農夫而
救其災沴不爲倏雲驟雨苟以應禱之虛名而有膏
澤積潤可以及民之實效卓然如侯者幾希矣凡天
子之爵命有德而致之則爲榮無功而享之則爲辱
今侯澤此一郡而施及于四鄰其受五等之爵而被

徐州祭枯骨文一首

嗟爾亡者昔惟何人兵耶氓耶誰其子孫雖不可知
孰非吾民暴骨纍纍覓之酸辛爲卜廣宅陶穴寬溫
相從歸安各反其真尚饗

謝雪文一首

天不吝澤神不忘職胡爲水旱吏則不德失政召災
莫知自刻雨則號晴旱則謁雪神旣不譴又滿其欲

四山暮霞萬瓦晨白驅穰疫癘甲折薶麥牲酒匪報
維以告絜神食無愧吏則慙慄尚饗

祭風伯雨師文一首

自秋不雨以至于今夏田將空秋種不入天子命我
禱于群望雲物既合風輒散之吏民皇皇不知所獲
罪敢以薄奠許于有神風若不作雨則隨至當以牲
幣報神之賜若格絕天澤弃民乏祀上帝臨視神其
不然尚饗

湖州謁文宣王廟文一首

至聖文宣王竊惟吏治以仁義為本教化為急故以

視事之三日祇見于先聖先師問所當先於學其所
從來尚矣敢忘其舊尚饗

湖州謁諸廟文一首

某神軾猥以不肖來長此邦實與有神分職幽明謹
以視事之三日祇見于廟惟神保佑斯民俾風雨時
若疫癘屏息吏既免罪神亦不愧尚饗

杭州謁廟祝文一首

軾以王命來守此邦事神養民敢不祇飭莅政之始
見于祠下安靜無事豐樂有年惟神相之使免罪戾
尚饗

東坡集卷三十四
言
謁文宣王廟祝文一首

軾以諸生誤蒙選擇昔自太史通守是邦今由禁林
出使浙右莅事之始祇見儒宮聖神臨之敢忘夙學
尚饗

祭英烈王文一首

欽誦舊史仰瞻高風報楚為孝徇吳為忠忠孝之至
實與天通開塞陰陽幹旋濤江保鄣斯民以食此邦
嗟我蠢愚所向竒窮豈以其誠有註輒從庚子之禱
海若伏降兮我岸聞千夫奏功牲酒薄陋報微施豐
敬陳頌詩侑此一鍾

杭州祝文八首

祈雨祝文

杭州之為郡負山帶江水澤不留逾旬不雨農有憂
色挽舟浚河公私告病吏既無術莫知所救不敢坐
視惟神之求庶幾閔民之窮赦吏之瀆賜以一雨敢
忘其報尚饗

謝雨祝文

舊穀不登陳廩已發稍失雨暘之節則懷溝壑之憂
惟神至明有禱必應敢陳薄奠少荅殊私願推無倦
之仁以畢有年之賜尚饗

祈晴祝文

大雩連日凝陰傷春閔惟艱食之民重此常寒之虐
役兵墮指行旅摧輶老弱號呼吏既慙於無術陰陽
舒卷神何惜而不為願掃重雲以昭靈貺使民奉事
永歲益虔尚饗

謝雨祝文

軾以憂寄出守此邦歲之不登實任其咎政雖無術
心則在民惟神聰明其應如響雨不暴物晴不失時
喜愧之心吏民所共式陳菲薦少荅神休尚饗

祈晴祝文

吳山廟

秋穀未登既食其陳嗣歲之虞當斂其新建此秋暘
載穫載春陰雨害之穡人罔功我發庫泉以實高廩
曷敕雨官遏止其淫既曷我場萬杵皆作待此坻京
援我溝壑英文烈武雨霽在予稽首告病其忍弗圖

謝晴祝文

敢以清酌庶羞之奠昭告于某神賞罰在朝吏申明
之及其有愆吏得正之雨暘在天神奉行之及其不
時神得請之惟吏與神各率其職有求必獲則無虛
食淫雨既止惟神之功肴酒匪報惟以告衷尚饗

開湖祭禱吳山水仙五龍三廟祝文

東坡集卷第三十四
杭之西湖如人之有目湖生芟葑如目之有翳翳久不治目亦將廢河渠有膠舟之苦鱗介失解網之惠六池化爲皆井而千頃無復豐歲矣是用因賑卹之餘資興開鑿之利勢百日奏功所患者淫雨千夫在野所憂者疾癘庶神明之陰相與人謀而協濟魚龍前導以破堅菰葦解折而迎銳復有唐之舊觀盡四山而爲際澤斯民於無窮宜事神之益勵我將大合樂以爲報豈徒用樽酒之薄祭也尚饗

謝吳山水仙王五龍三廟祝文

西湖堙塞積歲之患坐閱百更孰視而歎惟愚無知

妄謂非難禱于有神陰假其便不愆于素咸出幽贊大堤雲橫老葑席卷歷時未幾功已過半嗣事告終來哲所繕神卒相之罔咈民願肴酒之報我愧不腆尚饗

東坡集卷第三十四

東坡集卷第三十五

祭文二十五首

祭歐陽文忠公文一首

嗚呼哀哉公之生於世六十有六年民有父母國有
著龜斯文有傳學者有師君子有所恃而不恐小人
有所畏而不為譬如大川喬嶽不見其運動而功利
之及於物者蓋不可以數計而周知今公之沒也赤
子無所仰芘朝廷無所稽疑斯文化為異端而學者
至於用夷君子以為無為為善而小人沛然自以為
得時譬如深淵大澤龍亡而虎逝則變怪雜出舞鱗

蟬而號狐狸昔其未用也天下以爲病而其既用也則又以爲遲及其釋位而去也莫不冀其復用至其請老而歸也莫不惆悵失望而猶庶幾於萬一者幸公之未衰孰謂公無復有意於斯世也奄一去而莫予追豈厭世溷濁絜身而逝乎將民之無祿而天莫之遺昔我先君懷寶遁世非公則莫能致而不肖無狀因緣出入受教於門下者十有六年於茲聞公之喪義當匍匐往救而懷祿不去愧古人以忸怩緘詞千里以寓一哀而已矣蓋上以爲天下慟而下以哭其私嗚呼哀哉尚饗

祭魏國韓令公文一首

天生元聖必作之配有神司之不約而會既生堯舜禹稷自至仁宗龍飛公舉進士妙齡秀發秉筆入侍公於是時仲舒賈誼方將登庸盜起西夏四方騷然帝用不赦授公鈇鉞往督西旅公於是時方叔召虎入贊兵政出殿大邦恩威並行春雨秋霜兵練民安四夷屈降公於是時臨淮汾陽帝在明堂欲行王政羣后奏功罔厝于成召自北方付之樞衡公於是時蕭曹魏邴二帝山陵天下悸怛呼吸之間有雷有風有存有亡有兵有戎公於是時伊尹周公功成而

退三鎮偃息天下嗷然曷日而復畢公在外心在王
室房公且死征遼是卹嗚呼哀哉六月甲寅人之無
祿喪我宗臣我有黎民誰與教之我有子孫誰與保
之巍巍堂堂寧復有之公之云亡我無日矣慟哭涕
流何嗟及矣昔我先子没于東京公爲二詩以祖其
行文追典誥論極皇王公言一出孰敢改評施及不
肖待以國士非我自知公實見謂父子昆弟並出公
門公不責報我豈懷恩惟此涕泣寔哀斯人有肉在
俎有酒在樽公歸在天寧聞我言嗚呼哀哉尚饗

祭柳子玉文一首

猗歟子玉南國之秀甚敏而文聲發自幼從橫武庫
炳蔚文囿獨以詩鳴天錫雄味元輕白俗郊寒島瘦
嘹然一吟衆作卑陋凡今卿相伊昔朋舊平視青雲
可到寧驟孰云坎軻白髮垂脰才高絕俗性疎來詎
謫居窮山遂侶猩狖夜衾不絮朝甑絕餽慨然懷歸
投棄纓綬潛山之麓往事神后道味自飴世芬莫與
凡世所欲有避無就謂當乘除併畀之壽云何不淑
命也誰咎頃在錢塘惠然我覲相從半歲日飲醇酎
朝遊南屏莫宿靈鷲雪窓飢坐清閨間奏沙河夜歸
霜月如畫綸巾鶴氅驚笑吳婦會合之難如次組繡

翻然失去覆水何救維子耆老名德俱茂嗟我後來
匪友惟媿子有令子將大子後頽然二孫則謂我舅
念子永歸涕如懸雷歌此奠詩一搏往侑尚饗

祭單君貺文一首

嗚呼維君篤孝自天展如閔子人莫閒言內齊于家
外敏于官民謂父兄吏莫容姦信于朋友人得其驩
博學工詩數術精研人涉其一君有其全壽考富貴
人誰不然君獨何辜所向竒偏志不一遂悵莫歸怨
念我孤甥生逢百艱旣嬪于君謂永百年云何不弔
銜痛重泉何以慰君千里一搏人生如夢何促何延

厄窮何陋宦達何妍命也柰何追配牛顏嗚呼哀哉
尚饗

祭胡執中郎中文一首

胡君執中之靈君少在蜀從先府君凡蜀之士事賢
友仁我之知君固不待見從事于岐始識君面相從
之歡傾蓋百年見其孺子駒駿雛鷄非罪失官君則
先去我徂華州見君逆旅滛雨彌旬道淖沒車他人
為泣君樂有餘其後七年君掾計省雖獲一笑歡不
逾頃又復七年我守北徐君從其子徐獄是書雛騫
而翔駒亦千里惟我與君宛其老矣老人無徒相見

益親凡昔在岐今存幾人謂君仁人雖疾當壽云何
而然命也難究嗚呼執中人誰不死如君之賢不云
止此百鍊之剛日膾千牛匣而不用非我之羞孺子
肖君世有令問送君一觴永歸無恨尚饗

祭任鈇轄文一首

嗟君結髮從事於兵四十餘年公侯扞城更嘗世故
練達物情佐我治軍既嚴且平吏士肅然時靡有爭
汴泗橫流郭堞圯傾風埃霧露奔走經營與疾而歸
猶莫敢寧奄忽不救聞者歎驚子孫如林布褐藜藿
生知其勤死知其清酌觴告訣與涕俱零尚饗

祭歐陽仲純父文一首

仲純父之靈曰嗚呼哀哉文忠公之盛德子孫千億
與宋無極人惟曰不足仲純父之賢壽考百年一歲
九遷人惟曰當然柰何官止於一命壽不登四十誰
其尸之百不償一嗚呼哀哉此不足云也仲純父之
生也不以進退得喪有望於人豈其死也乃以死生
壽夭有責於神人徒知其文章之世其家操行之稱
其門而不知其志氣之豪健議論之剛果使之臨大
事立大節不難於殺身以成仁則夫造物者之挾其
死生之權也豈能病君也哉雖然往者見君於潁水

之上去歲君來見我於國門之東携被夜語達旦不窮凡所以謀道憂世而教我以保身遠旤者凜乎其有似於文忠今也奄兮忽焉而不復見也能不長號而屢慟乎道之難行蓋難其人豈無其人利害易之如仲純父不畏不慕獨立不懼則死及之嗚呼哀哉尚饗

祭王君錫丈人文

公之皇祖孝著閭里迨茲百年世濟其美少相弟長老相慈誨肅雍無間施及娣姒頎然四人厥德罔二軾始婚媾公之猶子允有令德夭閼莫遂惟公幼女嗣執壘篚恩厚義重宜有以報云何不淑契闊生死斂不拊棺葬不親祔豈不懷歸眷此微仕緘詞望哭以致奠餽惟此哀誠一念千里尚饗

祭文與可文一首

年月日從表弟蘇軾謹以清酌庶羞之奠致祭于故湖州文府君與可學士兄之靈曰嗚呼哀哉與可能復飲此酒也夫能復賦詩以自樂鼓琴以自侑也夫嗚呼哀哉余尚忍言之氣噎悒而填膺淚疾下而淋衣忽收淚以自問非夫人之為慟而誰為乎道之不行哀我無徒豈無友朋逝莫告余惟余與可匪亟匪

徐招之不來麾之不去不可得而親其可得而踈之
耶嗚呼哀哉孰能博德秉義如與可之和而正乎孰
能養民厚俗如與可之寬而明乎孰能爲詩與楚詞
如與可之婉而清乎孰能齊寵辱忘得喪如與可之
安而輕乎嗚呼哀哉余聞訃之三日夜不眠而坐喟
夢相從而驚覺滿茵席之濡淚念有生之歸盡雖百
年其必至惟有文爲不朽與有子爲不死雖富貴壽
考之人未必皆有此二者也然余嘗聞與可之言是
身如浮雲無去無來無亡無存則夫所謂不朽與不
死者亦何足云乎嗚呼哀哉尚饗

祭刁景純墓文一首

嗟我少君四十二歲君不我少謂我昆弟今我已老
鬢須蒼然君之永歸不爲無年我獨何憾過期而哭
人之云云哀此風俗涉江而東宛其山川顧瞻萬松
蔚乎蒼芊尚想松下幅巾杖屨迎我于門抵掌笑語
豈其忽焉斂茲一墳俛仰空山草木再春平生故人
幾半天下紛然日中掉臂莫夜我非至人心有往來
斗酒隻雞聊寫我哀尚饗

祭張子野文一首

年月日蘇軾謹以清酌庶羞之奠昭告于故子野郎

東坡集卷之三十三
中張丈之靈仕而忘歸人所共蔽有志不果日月其
逝惟余子野歸及強銳優遊故鄉若復一世遇人坦
率真古愷悌庀然老成又敏且藝清詩絕俗甚典而
麗搜研物情剖發幽翳微詞宛轉蓋詩之裔坐此而
窮鹽米不繼歎歌自得酒輒詣我官于杭始獲擁
篲歡欣忘年脫略苛細送我北歸屈指默計死生一
訣流涕挽袂我來故國實五周歲不我少須一病遽
蛻堂有遺像室無留嬖人云琴廢帳空鶴唳酌觴再
拜淚溢兩背尚饗

祭陳令舉文一首

嗚呼哀哉天之生令舉初若有意厚其學術而多其
才能蓋已兼百人之器既發之以科舉又輔之以令
名使取重於天下者若將畀之以位而令舉亦能因
天之所予而日新之慨然將以身任天下之事夫豈
獨其自任將世之士大夫識與不識莫不望其如是
是何一奮而不顧以至於斥一斤而不復以至於死
嗚呼哀哉天之所付為偶然而無意耶將亦有意而
人之所以周旋委曲輔成其天者不至耶將天既生
之以畀斯人而人不用故天復奪之而自使耶不然
令舉之賢何為而不立何立而不遂使少見其毫末

而其餘棄必有驚世而絕類者矣予與令舉別二年而令舉沒既沒三年而予乃始一哭其殯而弔其子也嗚呼哀哉尚饗

祭任師中文一首

年月日眉陽陳慥蘇軾健為王齊愈弟齊萬黃州進士潘丙古耕道謹以茶果清酌之奠致祭于故瀘州太守任大夫師中之靈曰允義大夫維蜀之珍詩之老成易之丈人去我十年其德日新庶一見之遽没元身惟慥與軾匪友則親自丙以降昔惟州民旅哭于庭惻焉酸辛禍福之來孰知其因自壽自夭自屈

自信天莫為之矧凡鬼神生榮死哀自昔所難持此令名歸于九原尚饗

祭堂兄子正文一首

維元豐五年歲次壬戌正月癸未朔三日乙酉弟責授黃州團練副使軾謹以家饌酒果之奠昭告于故子正中舍大兄之靈昔我先伯父內行飭修閭里之師不剛不柔允武且文喜愠莫窺歷官十一民到于今涕泣懷思遇其所立仁者之勇雷霆不移篤生我兄和擾而毅甚似不衰與人之周肅雍謹絜喜見于眉人各有心酸鹹異嗜丹素相訾穆穆我兄尊賢容

衆無適不宜天若不僭富貴壽考捨兄畀誰云何不
淑而止於是命也可疑我遷于南老與病會歸耕無
期斂不撫棺葬不執紼永恨何追寤寐東山兩塋相
望拱木參差諸父父子平生之好相從歲時兄死而
同我生而異斯言孔悲千里一樽兄實臨我尚醕勿
辭嗚呼哀哉尚饗

黃州再祭文與可文一首

年月日從表弟具官蘇軾謹以清酌庶羞之奠昭告
于亡友湖州府君與可學士文兄之靈嗚呼哀哉我
官于岐實始識君甚口秀眉忠信而文志氣方剛談

詞如雲一別五年君譽日聞道德爲膏以自濯薰藝
學之多蔚如秋蕢脫口成章粲莫可耘馳騁百家錯
落紛紜使我羞歎筆硯爲焚再見京師默無所云杳
兮清深落其華芬昔藝我黍今孰其饋啜漓歌呼得
溥而醺天力自然不施膠筋坐了萬事氣回三軍笑
我皇皇獨違垢紛俯仰三州眷戀桑粉仁施草木信
及麤麋昂然來歸獨立無羣俛焉復去初無戚欣大
哉死生悽愴蒿君君沒談笑大鈞徒勤喪之西歸我
竄江濱何以薦君採江之芹相彼日月有朝必曛我
在茫茫凡幾合分盡此一觴歸安于墳嗚呼哀哉尚饗

東坡集卷三十五
祭徐君猷文一首

故黃州太守朝請徐公君猷之靈惟公蚤厭綺紈富以三冬之學晚分符竹藹然兩郡之聲家世名臣始終循吏追繼襄陽之耆舊綽有建安之風流無鬼高談常傾滿坐有功陰德何止一人軾頃以蠢愚自貽放逐妻孥之所竊笑親友幾於絕交爭席滿前無復十漿而五餽中流獲濟實賴一壺之千金曾報德之未皇已興哀於永訣平生髣髴尚陳中聖之觴厚夜渺茫徒挂初心之劍拊棺一慟嗚呼哀哉尚饗

祭陳君式文一首

故致政大夫君式之靈猗歟大夫匪直也人矯然不隨以屈莫信大夫安之有命在天十年躬耕以娛其親親亡泣血幾以喪明免喪復仕哀哉爲貧從政于黃急吏緩民食黃之薇飲其水泉我以重罪竄于江濱親舊擯踈我亦自憎君獨願交日造我門我不自愛恐子垢紛君笑絕纓陋哉斯言憂患之至期與子均示我數詩蕭然絕塵去黃而歸即安丘園澹然無求抱潔沒身猗歟大夫有死有生如影之隨如環之循富貴貧賤忽如浮雲孰皆有子如二子賢千里一觴侑以斯文尚饗

祭蔡景繁文一首

嗚呼哀哉子之為人清厲孤峻經以仁義緯以忠信
才兼百夫斂以靜順子之事君悃欵傾盡挺然不倚
視退如進持其本心不負堯舜子之從政果藝清慎
緩民急吏不肅而震紛紜滿前理解迎刃子之爲文
秀整明潤工於造語恥就餘餽詩尤所長鏘然玉振
壽以配德天亦何吝有如子賢五十而盡我遷于黃
衆所遠擯惟子之故不我藉麟孰云此來乃拊其櫬
萬生擾擾寄此一瞬富貴無能俯仰埃燼子有賢子
汗血之駿幼亦頎然穎發齟齬天哀子窮以是餽贖

我困于旅愧莫子賑歌此奠詩以和虞殯嗚呼哀哉

祭歐陽伯和父文一首

嗚呼哀哉文忠之子譬之孔門則其高第其材不同
而皆有得公之一體惟伯和父得公之學甚敏且藝
罔羅幽荒掎撫遺逸馳騁百世有求則應取之左右
不擇鉅細如漢伯喈如晉茂先餘子莫繼公薨一紀
門人凋喪我老又廢退而講論放失舊聞日月其逝
欲操簡牘從伯和父解發疑蔽今其亡矣誰助我者
投筆掩袂斯文日化躡風系景安所止戾子獨確然
求之度數斷以凡例抱其孤學將以安適鑿不謀枘

歸從文忠與仲純父孰曰非計而我何爲寓詞千里
繼以泣涕嗚呼哀哉

祭石幼安文一首

嗟我去蜀十有八年夢還故鄉親愛滿前覺而無有
淚下迸泉竄流江湖隻影自憐聞人蜀音回首粲然
矧如夫子又戚且賢憂樂同之義不我捐我行過宿
子病已纏顧我而笑自云少痊念子仁人壽骨隱顙
携手同歸相視華顛孰云此來拊膺號天同驅並馳
俯仰而遷行即此路皇分後先哀哉若人令德世傳
才子文孫森然比肩天不吾欺後將蟬聯永歸無憾

舉我一邊嗚呼哀哉

祭司馬君實文一首

左僕射贈太師溫公之靈嗚呼百世一人千載一時
惟時與人鮮偶常竒公事 仁宗百未一施獨發大
議惟天我知 厚陵之初先事而規帝欲得民一尊
無私母子之間莫如孝慈人所難言我則易之 神
宗知公敬如著龜專談仁義輔以書詩枉尺直尋願
公少卑公曰天子舜禹之姿我若言利非天誰欺退
居于洛四海是儀化及豚魚名聞乳兒 二聖見公
曰子得師付以衡石惟公所爲公亦何爲視民所宜

有莠則鋤有疾則醫問疾所生師老民疲和我上策
決用無疑此計一定太平可基譬如農夫既闢既菑
投種未粒矧穫而炊賓客滿門公以疾詞不見十日
入哭其帷天為雨泣路人垂淚畫像于家飲食必祠
矧我衆僚左右疇咨共載一舟喪其楫維終天之訣
寧復來思歌此奠章以侑一卮嗚呼哀哉尚饗

祭王宜甫文一首

維元祐二年歲次丁卯九月庚戌朔十九日戊辰具
位蘇軾謹以酒果之奠昭告于故比部郎中贈光祿
大夫王公宜父親家翁之靈嗚呼宜父篤厚寬中德

世其家而位莫充非不能充知有天命直已而行不
充何病三公之子所乏非財風雨散之如振浮埃百
年夢幻其究何獲不與皆亡令名令德公雖耆舊我
尚同時不識其人想見其姿婚姻之好義貫黃壤有
媿古人不祖其往往謂趙人子孫其昌時其墓櫛我
言不忘嗚呼哀哉

祭范蜀公文一首

嗚呼 仁宗在位四十二年畦而種之有得皆賢既
歷三世悉為名臣今如晨星存者幾人孰如我公碩
大光明導日而昇燦焉長庚死生契闊公獨壽考天

實者之以殿諸老 二聖嗣位仁義是施公昔所言
略行無遺維樂未和公寢不寧樂成而薨公往則瞑
凡百君子願公無極胡不萬年以重王國責難之忠
愛莫助之嗟我後來誰復似之吾先君子秉德不耀
與公弟兄一日之少窮達不齊歡則無間豈以閭里
忠義則然先君之終公時在陳宵夢告行晨起計聞
先友盡矣我亦白髮聞公之喪方食哽噎堂堂我公
豈其云亡望公凜然猶舉我觴

祭黃幾道文

幾道大夫年兄之靈嗚呼幾道孝友烝烝人無間言

如閔與曾天若成之付以百能超然驥德風驚雲騰
入爲御史以直自繩身爲玉雪不汗青蠅出按百城
不緩不緼姦民惰吏實畏靡憎帝亦知之因事屢稱
謀之左右有問莫應君聞不悛與道降升吾豈羽毛
爲人所鷹抱默以老終然不矜環堵蕭然大布踈繒
妻子脫粟玉食友朋我遷淮南秋穀五登坐閱百吏
錐刀相仍有斐君子傳車是乘穆如春風解此陰凌
尚有典刑紫髯垂膺魯無君子斯人安承納幣請昏
義均股肱別我而東衣袂僅勝一卧永已吾將安憑
壽夭在天雖聖莫增君趙魏老老于薛滕天亦愧之

其世必興舉我一觴歸安丘陵

祭歐陽文忠公夫人文一首

嗚呼文忠之薨十有八年士無所歸散而自賢我是
用懼日登師門既友諸子入拜夫人望之愀然有穆
其言簡肅之肅文忠之文雖無老成典刑則存何以
嗣之使世不忘諸子惟迨好學而剛夫人實使兄弟
吾孫徼福文忠及我先君出守東南往違其顏病不
能見卒以訃聞自斂及葬覬奠莫親匪愧于今有醜
昔人寓詞千里侑此一樽尚饗

東坡集卷第三十五

